

Nanaaxuuk ina xan Inaatel Pol laa sin no Korin

¹ Iaa, Pol, Moroaa ta ilei taman xan sirsiir ngali tsap xan aposal Iesu Karisito ma xida taamat Sostenes.

² Gelulu atalaa abala inaatel laa sin xan no matenaanua Moroaa in Korin, laa sin gim biala Iesu Karisito ta guraii gim, ma ga ilei gim ngali tsap pat, mii abia di sin no xolot araraa di ta ilei iesan xida Orong Iesu Karisito, xadi ma xida Orong.

³ Amiimiilam ma malina laa sin gim, axaal sin Moroaa xida Mom ma Orong Iesu Karisito.

Tinabel mamainaang

⁴ Iaa tigiri putsangi axaau laa sin Moroaa ngali gim amuina ngali biala xan amiimiilam ta tali sin gim lalon Iesu Karisito.

⁵ Sin ia, Moroaa tii atubudaani gim sin no sal araraa ma nagim no papaare araraa ma no mat sinaae,

⁶ amuina sin nagiem papaare leng taman Karisito a se tsap so lalon gim.

⁷ Biala gim ga xap muun bula ngali xaa tinabel ina Nantanua biala gim ga liliis taman sasaa wat-wat ngali xida Orong Iesu Karisito naba aseat.

⁸ Ngali naba taxaariiti gim pupua sin xapkap, ngalibi naba xap xa na pupua ngali atuti gim taman namaang tsaxa sin xan leng xida Orong Iesu Karisito.

⁹ Moroaa naba xosaraa abala amuina ta tax-aariiti xan xuxubu ma ga ilei gim ngali xale etudim mii xan Tsi Iesu Karisito xida Orong.

No tseixirixi lalon xan matenaanua Moroaa

¹⁰ Iaa ningi awatwati gim, nugu no taamat sin iesan xida Orong Iesu Karisito, ngali gim araraa gim na uk bal engen gim ngali naba xap xa namaang ina tseixirixi labatina gim ma ngali gim ba til etudim taman uk adodo ma sinaae.

¹¹ Nugu no taamat, biexaal ina xan matenaanua Kolowi, di asaaiti iaa we, biexaa inema-gaae biaa labatina gim.

¹² Muina sawe iaa ta we na paatina abala, iexa ina gim a we, "Iaa amusili Pol;" o iexa, "Iaa amusili Apolos;" o iexa, "Iaa amusili Sepas,"* oro biexaal di we, "Iaa amusili Karisito."

¹³ Asen parawe, gim pupua ngali exasen Karisito sin no xolkolot ta et? Di tii ataxiwaa Pol papan tongol ngali gim? Di tii axadaani gim sin iesan Pol?

¹⁴ Iaa suk putsangi axaau we, iaa tii xap axadaani xaal ina gim, oro iaa tii axadaani mu Kirispus ma Gaius,

¹⁵ Sinsa, xa naba xap paare we, ia tii axaxadaan sin iesaaga.

¹⁶ (Iou, iaa tii axadaani bula no inaman nan xan matenaanua Stepanas oro iaa se xap pupua ngali adodomi nawe iaa tii axadaani xaal bula.)

¹⁷ Karisito a xap tulen iaa ngali axaxadaan, oro ngali baais taman inesaait mamainaang, ina xoror ina xan tongol. Tii xap tulen iaa ngali baais taman no totore ina sinaae xaal sin no inaman,

* **1:12 1:12** *Sepas - Biexa iesan Pita.*

nawe iaa xosaraa abala, di ba xap taltaalnge sin Karisito iwaa ta met papan tongol.

Karisito iwaa sinaae ma xoror ina Moroaa

¹⁸ Amuina biao inesaait ina xan minet Karisito papan tongol atangtangabaa sin biao di, di laa sin sal Edes, oro sin giem, biao xan atotoaa Moroaa, biao xan xoror.

¹⁹ Amuina Aisaia a se atalaa,
“Taa ba tsaalen xadi sinaae no unsinaae;
ma iaa ba atangtangabaa xan adodo iwaa ta asasing buxa.”☆

²⁰ Inaai se aia unsinaae? Inaai se aia ta asasing buxa sin lo? Inaabi se abia sinaae ina totore ina abala nan ul. Moroaa a se atangtangabaa biao sinaae ina abala xolkolmoxo ina inaman.

²¹ Amuina sin xan sinaae Moroaa, xolkolmoxo ina inaman tii xap atii ia taman xan sinaae. Moroaa tii suk taton ngali atoaa biao di ta taltaalnge sin nagelulu babaa is biao xolkolmoxo ta adodo we atangtangabaa.

²² No Jiu di saan ngali lasi xaa axixila xoror ma no Grik di nen tsalei sinaae.

²³ Oro giem baais taman Karisito papan tongol, biao at litlitke xadi no Jiu ma tangtangabaa sin no Gentail.

²⁴ Oro ngali biao di Moroaa ta se ilei di, biao no Jiu ma no Grik, Karisito, iwaa xan xoror Moroaa ma xan sinaae Moroaa.

²⁵ Amuina biao xan sinaae Moroaa, biao no inaman di ta adodo we atangtangabaa, asuk lot buxa ngen xadi sinaae no inaman. Ma xan watwat Moroaa biao no inaman di ta adodo we

a malumlum, biaa asuk watwat buxa ngen biaa xadi watwat no inaman.

²⁶ Nugu no taamat, gim na adodo mula, gim no sen mat taamat ti, sin leng Moroaa tii ilei gim. Gim tii xap xudu sin nagim no sinaae ina taamat ma tii xap xudu biaa no inaman di tii xap nanxilalaa malen gim no unsinaae o no lalaamua lot o no untang.

²⁷ Oro Moroaa axanei biaa no maarang biaa xolkolmoxo ta adodo we atangtangabaa ngali amangieli no unsinaae, Moroaa axanei biaa no maarang biaa xolkolmoxo ta adodo we a malumlum ngali amangieli biaa di ta watwat.

²⁸ Axanei biaa no maarang xolkolmoxo ta nenlii, ma no maarang ta nen amagurusiki ma no maarang gomsaa, ngali xosor gomsai no maarang biaa xolkolmoxo ta lasi,

²⁹ ngalibi xa na ba xap paraak nan no matan ia.

³⁰ Amuina Moroaa a xosaraa abala biaa gim ta manman lalon Iesu Karisito, iwaa ta tali sinaae sin gita xaal sin Moroaa. Lalon Karisito, Moroaa a xosaraa gita tutiik, pat ma ga gii mulangenai gita.

³¹ Biaabi malen Jeremaia ta atalaa; *“U na pa-paalii iwaa ta paraak, na paraak lalon Orong.”*☆

2

Sinaae so biaa ta xaal sin Nantanua Pat

¹ Nugu no taamat, biaa iaa ta xaalame sangan gim, iaa tii xap xaalame ngali baais taman xaa totore lot buxa o xa xariin sinaae, malen iaa tii baais taman xan papaare leng Moroaa.

² Sinsa iaa se adodo mu ngali baais taman Iesu Karisito ma xan taktaxiu papan tongol.

³ Iaa xaalame sangan gim lalon malumlum taman minataa ma xaraxin dididiir.

⁴ Nugu inesaait ma nugu babaais tii xap laa mii sinaae ma ngali tataii nagim no adodo taman no totore, oro taman namaang ngali asen xan xoror Nantanua.

⁵ Ngalibi nagim tinaalnge naba xap manman lalon xadi sinaae no inaman, oro papan xan xoror Morooa.

Sinaae xaal sin Nantanua

⁶ Oro giem paare taman inesaait ina sinaae labatina biao di ta se masak lalon Morooa. Oro a xap sinaae ina abala nan ul, o no lalaamua ina abala nan ul biao di ba ta xosorlii xadi xoror.

⁷ A xap, giem paare taman xan sinaae xuxii Morooa biao ta axuina ma ga ngiti sin atiltsoli ngali xida minaalam setauan sin xan axoxos.

⁸ A xap xaa lalaamua ina abala nan ul, di na atik axaautsi abala, nawe di nii atii abala, di nii xap ataxiwaa iwaa Orong ina minaalam papan tongol.

⁹ Oro Aisaia a se atalaa,
“A xap xa mat na se lasi o
a xap xa talinga na longmien
a xap xa xo na se adodo tsilli,
sawe Morooa ta se taxaaturungi ngali a biao
di, di ta titii ia.”☆

¹⁰ Oro Morooa a se putaasen sin gita taman xan Nantanuan.

Nantanua a xaa tsatsel ngali no maarang araraa ta riri ina xan no maarang Morooa.

¹¹ Ngali saa labatina no inaman ta atik axaautsi xan adodo taamat oro nantanuan taamat lalon ia. Sin abia uk sal a xap xa na atixi xan adodo Moroaa oro Nantanuan Moroaa mu.

¹² Gita xap mager adi aia nantanua ina xolkol-moxo oro iwaa Nantanua ta xaal sin Moroaa, ngali gita ba atik axaautsi biaa no tinabel Moroaa ta taal gomsaai sin gita.

¹³ Balawaa abala gelulu ta paare taman, a xap lalon totore taamat ta asingan gelulu taman oro taman totore Nantanua ta asingan gelulu taman ta atsapngen so ina Nantanua lalon totore ina Nantanua.

¹⁴ Iwaa taamat Nantanua ta xap manman sin a xap saansili biaa no maarang ta xaal sin Nantanuan Moroaa amuina biaa no maarang, atangtangabaai ia, ma ga xap pupua ngali atixi no, amuina balawaa no maarang di ba atii no sin Nantanua.

¹⁵ Taamat ta us taman Nantanua a pupua ngali ininte sin no maarang araraa oro xa taamat xaatsap a xap pupua ngali ininte sin.

¹⁶ “Saa atii xan adodo Orong?

Saa pupua ngali taal inanaa sin?”☆

Oro xida adodo xan Karisito.

3

No tsexxirixi ina xan matenaanua Moroaa

¹ Nugu no taamat, iaa xap pupua ngali paare sin gim malen gim, man lalon Nantanua oro, iaa paare sin gim malen gim ina xolkolmoxo ina inaman, no madalak lalon Karisito.

² Iaa tabali gim taman sus, a xap taman luxaal watwat, amuina gim xap mager taxaaturung ngali, ma aso talaawaa tsaa, gim xap mager taxaaturung ngali.

³ Amuina gim tino tsaa, malen abia no inaman ina abala xolkolmoxo. Ngali nagim no bal tsaxa ma no inemagaae, mii biexaal labatina gim, asen we gim ina abala xolkolmoxo, gim ta manman sin xan namaang.

⁴ Ngali nawe xa a we, "Iaa amusili Pol," o iexa a we, "Iaa amusili Apolos," gim ina abala xolkolmoxo ina inaman.

⁵ Iaa, Pol, iaa ma Apolos gelulu xan no untutule Morooa, gelulu ta laamuangen gim sin taltaalnge. Gelulu xosaraa biao tinaxaa Orong ta tali sin gelulu ngali xosaraa.

⁶ Iaa soxaa xalitsa, o Apolos a sili, oro Morooa mu a xosaraa ga tsik.

⁷ Iwaa ta soxaa ma iwaa ta sili; a xap xawas sin, ma asuk so Morooa tsaa a xosaraa ga tsik.

⁸ Iwaa ta soxaa ma iwaa ta sili no, delu arie xosaraa uk tinaxaa, ma delu ba alet iliil xuxuuk sin xadelulu tinaxaa tsaa.

⁹ Ngali gelulu xan no uk tinaxaa Morooa, gim xan no uma ma Xan Anua Morooa.

¹⁰ Sin xan amiimiilam Morooa a se tali sin iaa, iaa axosngi axaautsi atkale ina anua malen xa unsinaae ina untumtumar ma xa xaatsap a tumtumar papan. Oro xuxuuk ina gita na tumar axaautsi.

¹¹ Amuina a xap xa na pupua ngali axosngi xa atkale xaatsap ngen Iesu Karisito.

¹² Nawe xa a tumar papan abala atkale ina anua, taman goul, silwa, xaat ta matmirmir, no

ie, liil o paas ina pitpit,

¹³ mil xan tinaxaa naba asen ta sen we amuina biaa xan leng Moroaa ina ininte naba asen lalon waa. Ma ie naba asen sen mat laxen tinaxaa ta xosaraa. Ma ie naba xonon biaa tinaxaa ngali asen nawe axaau o atsaxa.

¹⁴ Nawe senaara ta tumaraa papan abia muina atkale aiepatsaa ie, iwaa untunumar naba adi xan iliil.

¹⁵ Oro nawe ie a uki, iwaa untunumar naba xosorlii, oro Moroaa naba atoa ia malen xa ta sol loxono abia ie suaamsuaam.

¹⁶ Gim xap atii we gim tsaa Xan Anua Moroaa ma iwaa Nantanuaan Moroaa a manman lalon gim?

¹⁷ Nawe xa a xosor atsoti Xan Anua Moroaa, Moroaa naba xosor atsoti bula ia, amuina Xan Anua Moroaa a pat, o gim bula gim abia Xan Anua Moroaa.

¹⁸ Gim nangaam apanaai gim tsaa, nawe xa ia labatina gim ta adodo we ia unsinaae sin abala namaang ina abala xolkolmoxo, na tsap tangtangabaa lalon no matan no inaman, ngalibi naba tsap sinaae lalon no matan Moroaa.

¹⁹ Ngali sinaae ina abala xolkolmoxo ina inaman a tangtangabaa lalon no matan Moroaa. Malen inaatel ta paare we, *"Moroaa atsinaa no unsinaae lalon xadi no sinaae tsaa."*☆

²⁰ Ma inaatel a sebula paare, *"Orong a se atii we xadi adodo no unsinaae a maarang gomsaa."*☆

²¹ Ngalibi gim nangaam paraak taman senaara taamat ta pupua ngali xosaraa. Soina mu no maarang araraa nagim no.

²² Pol o Apolos o Sepas* o xolkolmoxo o tino o minet o talaawaa o nowa, no maarang se araraa nagim no,

²³ Ma gim xan Karisito, ma Karisito xan Moroa.

4

Xan no Aposol Karisito

¹ Biaabi no inaman di na lasi gelulu malen gelulu xan no untutule Karisito biao ta taalnge tali gelulu ngali tilaamamil sin xan no totore ta xuxii Moroa.

² Nawe xa lalaamua lot a tali xa tinaxaa sin xan no untinaxaa, biao no untinaxaa di na amusili xan sirsiir xadi lalaamua.

³ Iaa xap adodo buxa ngali nawe gim ininte sin iaa o xa taamat a ininte sin iaa. Asuk so, iaa xap ininte sin iaa tsaa.

⁴ Nugu adodo lalon nugu butsa aleng, oro biao adodo a xap asen iaa malen iaa tutiik. Orong mu Iwaa naba ininte sin iaa.

⁵ Biaabi gim nangaam ininte setauan sin xa sin abia leng so. Liliis pupua sin Orong naba ta xaalame. Naba tali nan leng biao no maarang ta xuxii nan lodo ma naba putaasen abia xadi adodo xuxii no inaman nan xadi no butsa. Sin abia leng no inaman xuxuuk di ba tsiili xadi paipa'ii xaal sin Moroa.

⁶ Nugu no taamat, talaawaa, iaa se apuaa abala no sin iaa tsaa ma Apolos ngali nagim axaau, ngali gim ba asasing sin gelulu ngali muina abala papaare biao di ta we, "Gim nangaam laa buxa

* 3:22 3:22 Sepas - Biexa iesan Pita.

ngen senaara di ta atala.” Mil gim ba xap paraak sin taamat ta xuuk ngen iexa taamat.

⁷ Saa xosaraa iu xaatsap sin biexaal? No sen maarang iu ta tapkina no u tii xap adi no? Ma nawe iu tii adi no, ngalisa u ga paraak we u xap adi no?

⁸ Gim se adi abia no maarang araraa gim ta saan ngali, ngaa? O gim ga se tsap no untang, ngaa? O gim se tsap bula no king sin gelulu ta xap mager, ngaa? Iaa suk saan so ngalibi gim na tsap no king, ngali gelulu ba arie tsap no king mii gim.

⁹ Amuina sin nugu nanen Moroaa a se aturungi giem no Aposol nan xolot ina ngali asen abia xapkap ina buro malen no inaman di ta atut tali sin minet lalon xolot ina sarsar. Di aturungi giem ngali asen ma giem ga mat malen no tangtangabaa lalon wankaula, laa sin no angelo ma laa sin no inaman bula.

¹⁰ Gelulu no tangtangabaa ngali xan axaau Karisito oro gim sinaae lalon Karisito, ngaa? Gelulu se malumlum oro gim watwat ngaa? Di manglen gim, oro di amangieli gelulu, ngaa?

¹¹ Pupua sin abala leng gelulu itol ma marua, gelulu ugauga taman no uga ta tater, di xosaraa atsaxati gelulu ma gelulu man iis nan no xobel.

¹² Gelulu taxaa watwat taman no liman gelulu tsaa, nawe di xororaa gelulu, gelulu atubudaani di, nawe di asosongi gelulu, gelulu til watwat.

¹³ Nawe di paare tsaxa ngali gelulu, gelulu xisi taman mamainaang, gelulu suk malen abia no ro ina balan pula, ma gelulu malen pun biao xolkolmoxo ina inaman ta palolii.

¹⁴ Iaa xap atalaa abala ngali amangieli gim oro ngali atewaai gim malen nugu no xos so ina tsi.

¹⁵ Sinsa sangaul axuuk ina tausen ina inaman di ta tilaamamil sin gim lalon abia tino lalon Karisito, a xap nagim xaa mom na xudu, sinna lalon Iesu Karisito iaa tii se tsap nagim mom, lalon inesaait mamainaang.

¹⁶ Biaabi iaa ga suk ningi awatwati gim ngali gim na atolomi nugu namaang.

¹⁷ Ngali abala muina mu, iaa ba tulen Timoti laa sin gim iwaa nugu tsi ma iwaa iaa ta titii buxaai, iwaa ta suk so sin xan tinaxaa Orong. Timoti naba sebula asaaiti gim taman nugu no sal ina tino lalon Iesu Karisito, biao uk maarang iaa ta asasing taman sin no xolot araraa ina xan no matanaanua Morooa.

¹⁸ Biexaal ina gim, di paraak amuina di adodo we iaa ba xap xaalame ngali le uwaa gim.

¹⁹ Oro naba xap lil mu iaa na xaalame sangan gim, nawe Orong a siir, iaa ba tsalei sawe balawaa no parparaak di ta papaare taman, o xadi sen xoror.

²⁰ Amuina biao xan Maradaan Morooa a xap maara ina papaare mu oro ina xoror.

²¹ Semaarang gim saansili? Gim saan ngali iaa na xaalame sangan gim taman xa ririit o iaa na xaalame sangan gim lalon titii ma nantanua ina mangmagus?

5

Saali iwaa taamat tsaxa

¹ Di tali inesaait we, namaang ina matmatuul mii xaal xaatsap bala labatina gim, biao taamat

ta matmatuul mii xan tubu xan mom. Gim ba xap tatanginai abala namaang labatina no Gentail.

² Ma gim ga paraak taman abala, gim na us taman lolbiir o iwaa taamat aia ta xosaraa abala mat namaang, gim na saali ia, sin xan matanaanua Morooa.

³ Sinsa nawe iaa xap manman mii gim sin pakpak, iaa manman mii gim lalon nantanuaaga ma iaa ga se tali ininte sin aia xa ta xosaraa abala, ga malen mu iaa tii manman, mu tia.

⁴ Biaa gim ta tsap etudim lalon iesan xida Orong Iesu, ma iaa manman mii gim lalon Nantanua ma xan xoror xida Orong Iesu a manman bula,

⁵ gim na tali aia taamat laa sin Saatan, ngal-ibi biaa namaang tsaxa naba xosaraa atsoti ma Orong naba atoaa nantanuaan sin xan leng Orong.

⁶ Asuk xap axaau, ngali gim na paraak. Gim atii bula we, pu iis dokdok a pupua ngali apupueti araraa palawa di ta louxaa?

⁷ Gim na saali abia no iis xabaar ina namaang tsaxa, asuk so maase gim ba malen tsoki uul ta xap xa iis, biaa gim ba weaatia. Ngali Karisito, ia iwaa xida Esliwaa sipsip dokdok di ta se tsutsungit taman.

⁸ Biaabi gita na taxaariiti xida leng ina Esliwaa a xap mii iis xabaar ina namaang tsaxa ina minagaa, oro mii abia tsoki ta xap xa iis, biaa tsoki ta mixat ma so.

⁹ Lalon inaatel iaa tii atala laa sin gim, iaa tii asaait ngali gim, na xap man etudim mii no inaman tsaxa in lalon sal,

¹⁰ iaa xap paare we no inaman lalon xolkolmoxo, di no inaman tsaxa in lalon sal o no mataxaaxaa, no unpulapula ma no unlanglangaari sin no malagan. Oro ngali pep alen no, u na suk poroklii abala xolkolmoxo.

¹¹ Oro talaawaa iaa atatal sin gim ngali man palaaen biao no saa gita ta putsangi ia tsaa xida taamat, oro no inaman tsaxa lalon sal, mataxaaxaa, ma unlanglangaari sin no malagan ma unaamamok, ma taamat nunun, ma unpulapula. Nangaam angen mii iwaa mat taamat.

¹² A xap nago xolot ngali iaa ba ininte sin abia no inaman di ta man lokobel lalon xan matenaanua Morooa, oro axaau ngali gim ba ininte sin abia di lalon xan matenaanua Morooa.

¹³ Morooa naba ininte sin abia di lokobel. "Gim na saali iwaa untsaxa labatina gim."✠

6

Ininte labatina no untaltaalnge

¹ Nawe xa ina gim a ie mamaet mii iexa untaltaalnge, ngalisa ta tsap sangan unininte ta xap atii Morooa, o ga xap laa sangan no untaltaalnge?

² Gim xap atixi, we biao no untaltaalnge di ba ininte sin xolkolmoxo? O nawe gim ba ininte sin xolkolmoxo o gim ba sen ininte we sin no xirabas dokdok?

³ Gim xap atii we gita no untaltaalnge gita ba ininte sin no angelo? Ma nawe aweaatia, ngalisa gim ta xap pupua ngali atutiki no maarang sin abala tino?

✠ 5:13 5:13 Dut 17:7; 19:19; 21:21; 22:21, 24; 24:7

⁴ Biaabi gim na xap laa sangan xaa unininte biao no muun taltaalnge. Xa ina no untaltaalnge ina xan matenaanua Morooa naba pupua ngali lolong sin nagim no mamaet ma naa xosaraa malum labatina gim.

⁵ Iaa paatinai abala ngali amangieli gim, a xap xa labatina gim ta sinaae pupua ngali ininte sin abia xirabas labatina no untaltaalnge?

⁶ Oro iexa untaltaalnge a laa nan ininte mii iexa untaltaalnge ma di ga papaalii no muun taltaalnge di ga ininte labatina di.

⁷ Laamuaan no matan Morooa asuk xap tutiik ngali tali iexa uk untaltaalnge laamuaan xadi xalkale ina ininte no muun taltaalnge. Naba suk axaaui so ngali poroklii iexa untaltaalnge na xosaraa namaang tsaxa sin gim o na pula sin gim.

⁸ Oro gim tsaa gim apanaai ma xosaraa no namaang tsaxa sin nagim no taamat.

⁹ Gim xap atii we, biao di ta morokon di ba xap tapkina xan Maradaan Morooa. Gim na xap apanaai gim tsaa, biao di ta xosaraa namaang ina exus, ma langlangaari sin no malagan, ma di ta matmatuul mii aina o taamat minaxis, no taamat in nan sal ma no taamat di ta exus mii no taamat,

¹⁰ no unpulapula, no angen tsaxa, no unnunun, no unaamamok, ma unaababaa, di ba xap tapkina xan maradaan Morooa.

¹¹ Ma biexaal ina gim di tii weaatia ti laamua, Oro sin iesan Orong Iesu Karisito ma Nantanuan xida Morooa, Orong a se guraili nagim no namaang tsaxa ma ga apati ma atutiki gim.

Manglen Morooa taman nagim pakpak

¹² Biexaal di paare weaatala, “Iaa pupua ngali xosaraa no maarang araraa.” Oro iaa xisi weaatala, “A xap no maarang araraa a ma-mainaang sin gim ngali xosaraa.” Biexaal di paare weaatala, “Iaa pupua ngali xosaraa no maarang araraa.” Oro iaa xisi weaatala, “Iaa ba xap tsap xa untutule sin abia no maarang.”

¹³ “Luxaal ngali bal ma bal ngali luxaal,” oro Moroaa naba xosor atsoti no arie. Balawaa pakpak a xap ngali xosaraa namaang tsaxa in nan sal, oro ngali Orong ma Orong ngali pakpak.

¹⁴ Sin xan xoror Moroaa tii atapaasi Orong xaal sin minet ma naba atapaasi gita bula.

¹⁵ A sen parawe, gim xap atii we nagim no pakpak, no xolkolot ina Karisito tsaa? A pupua ngali iaa na adi no xolot ina Karisito ma ina aturung todomien no, ngali tsap malen xolot ina xan pakpak aina in nan sal? Asuk xap!

¹⁶ A sen parawe, gim xap atii bula we, iwaa xa ta todomien ia tsaa mii aina in nan sal, delu se arie tsap pakpak axuuk. Sinsa Moroaa tii se paare, “*Delulu ba se tsap pakpak axuuk mu.*”[☆]

¹⁷ Oro iwaa xa ta todomien ia tsaa mii Orong, ia axuuk mii ia lalon nantanua.

¹⁸ Sol papaalii no namaang tsaxa in nan sal. Biexaa namaang tsaxa taamat ta xosaraa a tsap lokobel ina xan pakpak, oro iwaa xa ta xosaraa namaang tsaxa in nan sel, a se xosaraa namaang tsaxa sin xan pakpak tsaa.

¹⁹ A sen parawe, gim xap atii we biao nagim pakpak Xan Anua Moroaa ina Nantanua Pat,

[☆] 6:16 6:16 Til 2:24

iwaa lalon gim, iwaa gim ta adi sin Moroaa? Gim xap tapkina gim tsaa.

²⁰ Moroaa tii uuli gim taman iliil, biaabi gim na manglen Moroaa taman nagim pakpak.

7

Xalkale ina minaxis

¹ Talaawaa ngali abia no maarang gim ta atalaa xaalame sin iaa: Axaau ngali xa taamat na xap maxis.

² Oro amuina sin no daan namaang tsaxa in nan sal, no taamat xuxuuk di na ie tubu ma no aina xuxuuk di na ie maxis.

³ Iwaa taamat na xosor puua ngali araraai xan manginngin xan tubu ngali matul mii malen mu xan tubu bula na araraai xan manginngin xan maxis.

⁴ Aina minaxis a xap tapkina no isuaan tsaa oro xan maxis a tapkina no isuaan ia a malen bula taamat minaxis a xap tapkina no isuaan tsaa oro xan tubu a tapkina xan no isuaan.

⁵ Aso gululu nangaam tilbanti xan manginngin xa ina gululu ngali matul etudim, oro naba axaau ngali gulu na sirawaa nugulu xa adodo ngali ben tilbanti abia namaang ngali gulu na ben man lalon sausawit. Mil gululu na sebula matul etudim ngali Saatan naba xap xonon gululu amuina gulu ta xap arongi nugulu xalkale ina minaxis.

⁶ Iaa paatinai abala malen inanaa mamainaang a xap ngali atsapngen xa paare watwat sin gim.

⁷ Iaa saan ngali no inaman araraa di na malen iaa biaa iaa ta xap maxis. Oro Moroaa tii se tali

xida no tinabel xuxuuk. Xan tinabel xa taamat ta xuuk axaatsap sin iexa.

⁸ Talaawaa iaa ga paare laa sin abia no taamat ma aina nal: Axaau di ta xap maxis malen iaa.

⁹ Oro nawe di xap pupua ngali arongi abia manginngin ina pakpak, asuk axaau di na maxis ngali biao no manginngin ina sasaae naba xap laamuangen di laa lalon namaang tsaxa.

¹⁰ Laa sin no minaxis iaa tali abala lo. A xap iaa, Orong tsaa a tali: xa aina minaxis na xap atsiplii xan maxis.

¹¹ Oro nawe iwaa aina atsiplii xan maxis, na suk xap maxis oro na sebula tsap ukbal ngali mula laa sin xan maxis. Ma xa taamat minaxis bula na xap atsiplii xan tubu.

¹² Laa sin biexaal iaa paare we (iaa mu, iaa paare, a xap Orong): Nawe xa ina xida xa taamat ia xan tubu ta muun taltaalnge ma ga siir ngali manman mii, iwaa taamat na xap atsiplii xan tubu.

¹³ Ma nawe xa aina a maxis sin xa taamat iwaa ta muun taltaalnge ma iwaa taamat ga siir ngali manman mii ia, iwaa aina na xap atsiplii ia.

¹⁴ Sinsa iwaa muun taltaalnge ina taamat minaxis Morooa a se apati sin xan tubu ma iwaa muun taltaalnge aina minaxis, Morooa a se apati sin xan maxis. O nawe a xap so, xadi notsi di ba malen notsi in nan sal oro amuina aso xadi notsi di pat lalon no matan Morooa.

¹⁵ Oro nawe iwaa muun taltaalnge a we na laa palaaen, papaalii na laa. Iwaa untaltaalnge taamat o aina a se leiwaa sin xadelulu minaxis. Morooa a se ilei gita ngali man lalon malina.

¹⁶ Aina minaxis u sen atik wenangen we u ba soro atoaa num maxis? O taamat minaxis u sen atik wenangen we u ba soro atoaa num tubu?

¹⁷ Gita xuxuuk gita na manman tsaa lalon abia xalkale ina tino biao Orong ta se tali sin gita malen Morooa tii ilei gita. Balawaa totore watwat ia tii se tali sin xan no daan matenaanua Morooa.

¹⁸ Nawe xa taamat ia ta se xasau tsaa biao Morooa tii ilei? Na xap xonon ngali malen aia di ta xap axasui. Nawe xa taamat ia ta xap xasau biao Morooa tii ilei? Di na xap axasui ia.

¹⁹ Sinsa nawe xa taamat a xasau o a xap xasau biao maarang gomsaa mu, oro gita na long amusili mu xan totore watwat Morooa.

²⁰ Gita xuxuuk gita na manman tsaa lalon abia xalkale biao gita tii manman lalon malen Morooa tii ilei gita.

²¹ Nawe Morooa tii ilei iu sin u tii untutule, nangaam lolbiir taman abia oro nawe u pupua ngali tsap leiwaa, xosaraa.

²² Amuina iwaa untutule Orong tii ilei ia, ia taamat leiwaa xan Orong; malen mu taamat iwaa tii leiwaa biao Orong tii ilei ia xan untutule Karisito.

²³ Morooa auuli gim taman xaraxin iliil, biaabi gim na xap amusili no inaman biao di tii asaati gim taman sawe gim na xosaraa ngali atatoni Morooa.

²⁴ Nugu no taamat, no taamat xuxuuk di na man mula sin abia xalkale malen Morooa tii ilei di.

²⁵ Talaawaa taman no aina uul di ta xap atii taamat: A xap xa totore watwat na xaal sin

Orong, oro iaa taal ininte malen iwaa xa Orong ta asen xan biirbirum sin, biao gim ta pupua ngali taltaalnge sin.

²⁶ Amuina gita se manman talaawaa lalon abala no xariin mamaet, iaa adodo weaatala, axaau ngali gim na man mula malen gim tsaa.

²⁷ Gim se maxis? Nangaam atsiplii num tubu. Gim xap maxis? Nangaam nanen ngali xa tubu.

²⁸ Oro nawe u maxis, u xap xosaraa namaang tsaxa ma nawe xa aina uul a maxis, a xap xosaraa xa namaang tsaxa. Oro biao di ta maxis, di ba tatanginai no daan xirabas lalon abala tino, ma iaa ga saan ngali gim ba leiwaa sin abala no xirabas.

²⁹ Nugu no taamat senaara iaa ta we ina asaait taman aweaatalaa: no leng a se pitpit, ma talaawaa laa, no taamat minaxis di na tino malen di xap maxis sin xa,

³⁰ ma biao di, di ta lolbiir, di na malen di xap lolbiir. Biao di ta taton, di na malen di xap taton, Biao di ta iil maarang, di na xosaraa malen biao no maarang a xap xadi no ngali tilaamamil.

³¹ Ma biao di, di ta taxaa taman no mat maarang ina abala xolkolmoxo ina inaman di na xap taliil sin no. Amuina balawaa xolkolmoxo taman xan no mat namaang naba met.

³² Iaa saan ngali gim na leiwaa sin nagim no lolbiir. Iwaa taamat ta xap maxis adodo buxa taman xan no tinaxaa Orong, ngali na atatoni Orong.

³³ Oro iwaa taamat minaxis asuk adodo buxa ngali no tinaxaa ina abala xolkolmoxo ina inaman ngali na atatoni xan tubu.

³⁴ Ma xan no adodo ga se xudu sin xan tubu ma Orong. Iwaa aina ta xap maxis o iwaa aina uul ta xap atii taamat, a suk adodo buxaai xan tinaxaa Orong, amuina xan adodo ngali taal araraai xan pakpak ma nantanuan sin Orong. Oro aina minaxis a taliil sin no tinaxaa lalon abala xolkolmoxo ina inaman, ngali na atatoni xan maxis.

³⁵ Iaa paatinai abala ngali nagim axaaau tsaa, a xap ngali tilkaali gim, ngalibi gim ba taxaa ngali Orong ma ngali xap tigiri adodo taman biexaa maarang ngali gim na xosaraa.

³⁶ Nawe xa adodo we xan namaang a xap tutiik laa sin aia aina uul ta xanei ngali ma xan no miet ga laa lapalaa ma iwaa taamat ga adodo ngali na maxis sin, na xosaraa malen ta saansili. A xap xosaraa xa namaang tsaxa. Delu na emaxise.

³⁷ Oro iwaa taamat ta se atutiki abia maarang lalon xan adodo lalon xan butsa tsaa, iwaa a xap saanen ngali na maxis, ma ga arongi xan sirsiir ma ga se xosaraa xan adodo tsaa ngali na xap maxis sin aia aina uul, ilawaa taamat a xosaraa namaang tutiik.

³⁸ Biaabi, iwaa ta maxis sin aina uul ta xap atii taamat, a xosaraa namaang tutiik oro iwaa ta xap maxis sin iwaa aina a xosaraa namaang axaaau buxa.

³⁹ Aina a maxis sin xan maxis pupua sin xapkap ina xan tino. Oro nawe xan maxis amet, a leiwaa ngali maxis sebula, oro na maxis sin xa untaltaalnge tsaa.

⁴⁰ Lalon nugu ininte, iwaa aina naba suk taton, nawe a man weaatia ma nugu adodo a ukbal mii

Nantanuan Morooa.

8

Luxaal di ta tsutsungit tali sin no malagan

¹ Talaawaa taman biao luxaal di ta tsutsungit tali sin no malagan. Gita atii we gita araraa gita ie sinaae. Oro biexaal taman abala sinaae di ba adi no xo lot oro titii atiltsomi biexaal.

² Iwaa taamat ta adodo we atixi no maarang, a xap mager atixi buxaai tsaa no maarang ngali na atii.

³ Oro iwaa ta titii Morooa, Morooa atii ia.

⁴ Ngalibi biao di, di ta ngani luxaal ina tsutsungit tali sin no malagan: Gita atii we, iwaa nan malagan a maarang gomsaa lalon abala xolkolmoxo. Sinsa Morooa mu axuuk.

⁵ Biexaa inaman di paare we biexaa mat laxen morooa biao di tino nan balalangit ma nan balan pula, aso a xudu no inaman di ilei no daan morooa ma no daan orong.

⁶ Oro ngali gita tsaa Morooa mu axuuk Mom, iwaa ta axosngi no maarang araraa ma iwaa gita ta tino sin, ma Orong mu axuuk Iesu Karisito, sin ia mu ti axosngi no maarang araraa, ma sin ia gita ga tino.

⁷ Oro a xap no inaman araraa di atii abala soina. Biexaa inaman di adodo tsaa ngali na-maang ina tsutsungit laa sin no malagan, biao ne di ngani biao mat luxaal di soro adodo we biao mat luxaal tsaa xadi no malagan. Ma xadi no adodo lalon xadi no butsa ta xap leng nawe axaau ngali ngani abala luxaal o a xap. Oro nawe di ba

ngani, di ba saaen malen di se xosaraa namaang tsaxa.

⁸ Oro luxaal naba xap tali gita laa atat sangan Morooa, gita ba xap tsaxa nawe gita xap angen ma luxaal naba xap tali xawas sin gita nawe gita ngani.

⁹ Gim na tilaamamil, ngalibi nagim no namaang ina leiwaa ngali ngani abala luxaal na xap tsap xa at litlitke sin abia di xadi no adodo lalon xadi no butsa ta xap leng.

¹⁰ Biaa xa taman xan adodo lalon xan butsa ta xap leng ma ga lasi iu, u ta ie sinaae o u ga xale angangen lalon xadi anua malagan ina langlangaari, u ba anaai ia ngali ngani abia luxaal di ta tsutsungit tali sin no malagan.

¹¹ Biaabi, iwaa xida taamat xan no adodo lalon xan butsa ta xap leng, iwaa Karisito ta met ngali, u ba atsaxati sin num sinaae.

¹² Nawe gim xosaraa namaang tsaxa sin nagim no taamat, sin abala sal, gim se xosor atsaxati xan tinaalnge num no taamat, abia di xadi no adodo lalon xadi butsa ta xap leng. Gim ga se xosaraa namaang tsaxa ngali epuske mii Karisito.

¹³ Biaabi nawe maarang iaa ta ngani a xosaraa nugu taamat ngali litke sin namaang tsaxa, iaa ba suk xap bula ngani xa nganei, ngalibi iaa ba xap xosaraa ia ngali litke.

9

Sawe no aposal di ta pupua ngali xosaraa

¹ Iaa leiwaa ngali amusili nugu adodo. Ma iaa aposal. Ma iaa ga lasi Iesu xida Orong. Amuina

sin abia, gim no waawaan ina nugu tinaxaa lalon Orong.

² Nawe xaal di we iaa xap aposal, aso we gim nanxilalaa we iaa aposal, amuina nagim xalkale lalon Orong asoi we iaa aposal.

³ Balawaa, nugu papaare xaxawil xaali iaa sin abia di, di ta xalkale lalon ininte sin iaa:

⁴ Asen parawe a tutiik ngali gelulu na xap ngani luxaal ma nun daan sin gim ngali nagelulu tinaxaa, ngaa?

⁵ Asen parawe, a tutiik ngali gelulu na xap eses mii nagelulu no tubu, di ta taltaalnge, malen biexaa aposal ma xan no taamat Orong ma Sepas?*

⁶ O iaa mu ma Banabaas gelu na taxaa xuxute ngali nagelulu xalkale ina tino?

⁷ Iwaa ta taxaa malen xa unmakmaxil, ia tsaa a xap uuli no maarang ta muun ngali. Iwaa ta soxaa uma waain naba xap ngani no greip. Iwaa ta tilaamamil sin xan no sipsip naba nun sin abia no daan ina sus.

⁸ Iaa amusili mu xan adodo taamat, ngaa? Xan lo Moses a paare bula taman abia uk maarang.

⁹ Amuina Moses atala lalon lo: *"Gim nangaam pitsi ngutsina bulmakau biao ta es xutsili lii no wit sin xan no pinpin."*☆ U we, ilawaa bulmakau Morooa adodo buxa tsaa ngali?

¹⁰ Asuk so, a paare taman abala ngali gita, taa? Iou, atalaa abala ngali gita amuina iwaa taamat ta xaii pula ngali soksok ma iwaa xa ta exasen lii

* 9:5 9:5 Sepas - Biexa iesan Pita. ☆ 9:9 9:9 Dut 25:4

no wit sin xan pinpin, di xosaraa abala no lalon tinaalnge ina exasen abia luxaal ina tatat.

¹¹ Gelulu soxaa xalitsa ina nantanua labatina gim, ngali gim ba tsik axaau buxa sin namaang ina Nantanua. Biaabi naba axaau ngali gim na tali xaa was sin gelulu ngali tiltsomi pakpak.

¹² Nawe a tutiik ngali biexaal di na adi abia tiltsomi sin gim, a suk so ma a suk tutiik ngali gelulu ba adi weaatia.

Naba tutiik sin gelulu ngali xosaraa abia oro gelulu tii xap xosaraa abia. A xap. Gelulu ti taton ngali adi no mamaet ngali gelulu na xap tilbanti biao inesaait mamainaang ina Iesu Karisito.

¹³ Gim atii we biao di, di ta taxaa nan Xan Anua Morooa di adi xadi luxaal nan Xan Anua Morooa, ma biao di, di ta taxaa papan ibe tsutsungit, di exasen bula no senaara di ta tabiel taman papan ibe tsutsungit.

¹⁴ Sin abia uk sal, Orong a se paare watwat we, biao di, di ta babaais taman inesaait mamainaang, di na adi xadi iliil sin inesaait mamainaang.

¹⁵ Oro balawaa naba tutiik sin gim ngali uuli iaa oro iaa ti xap atsuraa gim ngali xosaraa abia. Ma iaa xap atalaa abala sin gim ngali gim ba xosaraa abia sin iaa. Naba suk axaau ngali ina setauan met ngalibi gim ba xap pupua ngali uuli iaa, ma ngali xa na xap tilkaali iaa ngali paraak biao iaa ba ta xap alet iliil nawe iaa baais.

¹⁶ Sinsa nawe iaa baais taman inesaait mamainaang, iaa xap pupua ngali paraak amuina Morooa a ilei iaa ngali baais ma iaa na long

amusili. Xariin xirabas naba tsap sin iaa nawe iaa xap baais taman abia inesaait mamainaang.

¹⁷ Nawe iaa baais amuina iaa tsaa iaa saan ngali xosaraa abia, biao a tutiik sin iaa ngali adi xa iliil; Oro a xap, iaa tigiri baais amuina Morooa a tali tinaxaa sin iaa ngali xosaraa abia.

¹⁸ Naba axaa buxa ngali iaa na alet iliil ngali nugu babaaais, oro nugu iliil mu ngali babaaais taman inesaait mamainaang taman xariin tata-ton.

¹⁹ Aso iaa leiwaa, ma xa a xap tapkina iaa, oro iaa xosaraa iaa tsaa malen xa untutule sin no inaman araraa, ngalibi iaa ba giwaa xuduxudu ina inaman laa sin Karisito.

²⁰ Sin no Jiu iaa se tsap malen xa Jiu, ngali giwaa di laa sin Karisito; ma sin abia di, di ta man paina xan lo Moses, iaa se tsap malen xa paina lo, oro iaa tsaa iaa xap man paina xa lo ngali iaa ba giwaa biao di tii man paina lo, laa sin Karisito.

²¹ Sin abia di, di ta xap manman paina xan lo Moses, iaa tsap malen xa ta xap man paina lo. Oro iaa xap leiwaa sin xan lo Morooa, oro iaa manman paina xan lo Karisito ngali giwaa abia di, di tii xap man paina lo, laa sin Karisito.

²² Sin abia di, di ta malumlum lalon xadi tinaalnge, iaa se tsap malumlum ngali giwaa di laa sin Karisito. Iaa se tsap malen no maarang araraa sin no inaman araraa, ngalibi sin no mat namaang, iaa ba soro giwaa xaal laa sin Karisito.

²³ Iaa xosaraa abala no ngali tiltsomi inesaait mamainaang ngali puaren araraai no xolot, ngali iaa ba exasen abia no tubudaan.

²⁴ Gim xap atii we, lalon etsil, no unsolsol

araraa di sol sin etsil, oro taamat axuuk mu naba adi bungwal? Gim na sol watwat ngali tsiili abia bungwal.

²⁵ No daan inaman di ta sar sin no sarsar di laa sin no asasing watwat. Di xosaraa abia ngali tsiili bungwal biala naba ta tamsi, oro gita xosaraa abia ngali tsiili abia bungwal ta man laaliu.

²⁶ Biaabi, iaa ga xap sol malen taamat ta sol tangtangabaa; iaa xap sas malen taamat ta tuut gomsaai maal taman no liman.

²⁷ A xap, oro iaa xonkonon no isuaaga ma iaa ga xosaraa ngali nugu untutule, ngalibi mil iaa ta se baais taman inesaait mamainaang sin biexaal, iaa ba manman tsaa lalon abia xalkale axaau ngali adi abia bungwal.

10

Israel lalon xobel biil

¹ Nugu no taamat, iaa saan ngali gim na adodomi ma atii soina we, xida no iaaiaa ti laamua, di tii eses paina xelangit ma di tii ga es tabaxi Laman Tok.

² Moroaa tii axadaani di araraa lalon xelangit ma lalon Laman Tok ma di ga tsap xan no inaman Moses.☆

³ Di araraa, di ngani abia manaa ta xaal balalangit,☆

⁴ ma di ga nun daan xaal lalon abia xaat ina nantanua; biala Moroaa ta tali sin di; biala ta es etaxaa mii di, ma biala xaat, ia mu Karisito.☆

☆ 10:2 10:2 Exo 14:21-29 ☆ 10:3 10:3 Exo 16:2-12 ☆ 10:4 10:4 Exo 17:6

⁵ Oro Moroaa tii xap taton sin xuduxudu ina di; biaabi xadi no pakpak ga matul met puaa abia xobel biil.

⁶ Balawaa no maarang atsap malen no puapua ngali alengi gita, ngali xida no butsa naba xap amusili no namaang morokon malen di.

⁷ Gita na xap tsap no unlanglangaari ina no malagan malen biexaal ina di. Moses tii atalaa: *"No inaman di tsotso ma di ga nun ma angen ma di ga amaaslen di tsaa taman no namaang tsaxa ina tsuliu."*✠

⁸ Gita na xap xosaraa namaang tsaxa ina tsuliu malen di, ma sin nan leng ta xuuk mu 23,000 inaman di met.✠

⁹ Gita na xap xonon Orong✠ malen biexaal ina di ma no tsitsi di ga ngaal amantei di.✠

¹⁰ Ma gim na xap ngurnguruk malen biexaal di ta xosaraa,✠ ma angelo sasas ga sas amantei di.

¹¹ Balawaa no maarang atsap sin di malen no puapua. Moses ga atalaa no, ngali atewaai gita sin biao no maarang. Amuina gita tino lalon abia no leng biao no xapkap ina no leng tii se xaalame.

¹² Sinsa nawe u adodo we u se tilwatwat u na suk tilaamamil ngali u ba xap xol.

¹³ A xap xa xonkonon ta tsap sin gim, biao ta xaatsap sin abia tii tsap bula sin no inaman. Ma Moroaa asuk so; naba xap poroklii gim sin xonkonon ta lot buxa ngali aiépatsaa. Oro nawe gim man sin xonkonon, naba tali xa sal bula ngali sol loxona ngalibi gim ba pupua ngali epuske mii.

✠ **10:7 10:7** Exo 32:6 ✠ **10:8 10:8** Nem 25:1-9 ✠ **10:9 10:9** Exo 17:2; Saam 78:18; 95:9; 106:4 ✠ **10:9 10:9** Nem 21:5-6 ✠ **10:10 10:10** Nem 16:41; 17:5, 10

Luxaal sin no malagan ma ina Orong

¹⁴ Biaabi nugu no taamat, gim na sol poroklii namaang ina langlangaari sin no malagan.

¹⁵ Iaa paatinai abala sin gim malen gim no unsinaae, gim ininte sin gim tsaa sin senaara iaa ta paatinai.

¹⁶ Biaa sobuk gita tii nun taman, sin xan luxaal Orong, ma biao gita tii putsangi axaau sin Moroa, biao gita ta nun sin, gita exasen lalon xan dal Karisito. Ma biao tsoki gita ta tsabaxi, ma biao gita ta ngani, gita exasen lalon xan pakpak Karisito.

¹⁷ Amuina tsoki axuuk, o gita biao gita ta xudu, gita xuuk sin pakpak, amuina gita araraa gita exasen tsoki ta xuuk.

¹⁸ Gita na lasi no inaman Israel, biao di ta ngani sawe di ta tali ngali tsutsungit, di exasen abia tsutsungit papan abia ibe tsutsungit.

¹⁹ Biao iaa ta paare weaatala, biao tsutsungit di ta tali sin no malagan a lot, o u we iwaa malagan a lot buxa?

²⁰ A xap, oro biao no tinabel di ta tsutsungit tali sin no malagan, a laa sin no salawa tsaxa, a xap laa sin Moroa, ma iaa ga xap saan ngali gim na exasen mii no salawa tsaxa.

²¹ Gim xap pupua ngali nun nan xan sobuk Orong ma nan xadi sobuk no salawa tsaxa bula. Asuk xap pupua ngali gim na angen papan xan ibe Orong ma papan xadi ibe no salawa tsaxa.

²² Asen parawe, gita ta we, gita na amoki Orong ngali na magaa? Ma gita sen adodo we, gita watwat buxa ngen ia?

Untaltaalnge ta leiwaa

²³ Biexaal ina gim, di paare we, “Giem pupua ngali xosaraa no maarang araraa.” Biaa aso. Oro iaa paare we, “No maarang araraa a xap axaau.” Biexaal ina gim, di paare we, “Giem pupua ngali xosaraa no maarang araraa,” Oro iaa paare we, “A xap no maarang araraa naba tiltsoxomi gita.”

²⁴ Na xap xa na tsaltsalei xan axaau tsaa, oro na tsatsel ngali xadi axaau biexaal.

²⁵ Gim na ngani no maarang araraa di ta sune taman no lalon anua susune ina xarop ma gim na xap atsuraa di taman xa xarop, nawe di tsutsungit taman o a xap, ngalibi adodo ina nagim no butsa naba xap atuti gim.

²⁶ Amuina, *“balawaa balan pula xan Orong ma no daan maarang araraa lalon.”*☆

²⁷ Nawe xa muun taltaalnge, a ilei gim laa sin xa luxaal ma gim ga saan ngali laa, ngani senaara di ta tabiel taman laamuaan gim ma gim na xap atsura ngali xa atsutsura taman nagim no adodo lalon nagim no butsa.

²⁸ Oro nawe xa a paare ngali gim weaatala, balawaa luxaal di tsutsungit taman, biaabi, nangaam ngani biaa luxaal ngali xan axaau aia taamat ta asaaiti gim ma amuina xan adodo ina xan butsa a we biaa luxaal atsaxa ngali gim ba ngani.

²⁹ Balawaa xan adodo iexa taamat, a xap num. Ngalisa biaa iaa ta leiwaa o xa xaatsap ga wena ininte sin iaa taman xan adodo lalon xan butsa.

³⁰ Nawe iaa putsangi axaau sin Moroaa ngali nugu luxaal, ngalisa di ta ininte sin iaa ngali

senaara iaa ta putsangi axaaui laa sin Morooa ngali?

³¹ Biaabi nawe gim angen o nun o semaarang gim ta xosaraa, gim na xosaraa no araraa ngali xan minaalām Morooa.

³² Gim nangaam xosaraa xa ngali na litke, nawe xa ina no Jiu o no Gentail o xan matenaanua Morooa.

³³ Sinsa nawe iaa xonon ngali atatoni no daan inaman sin no daan sal, iaa xap tsatsel ngali nugu axaaui tsaa oro ngali xadi axaaui no daan inaman, ngalibi Morooa naba atoa di.

11

¹ Gim na atolomi nugu puapua, malen iaa ta amusili xan puapua Karisito.

Namaang ina langaari

² Iaa pa'ii gim ngali gim ta tigiri adodomi iaa sin no daan maarang ma gim ta taxaariti abia asasing iaa ta se tali no sin gim.

³ Talaawaa iaa we gim na xilalaa weaatala: Karisito ia xuan no taamat araraa, ma xuan no aina iwaa taamat, ma xuan Karisito iwaa Morooa.

⁴ Taamat a sawit ma ga tali xan totore propet taman xuan, ta baaii, amangieli xuan tsaa.

⁵ Ma aina ta sawit ma tali xan totore propet taman xuan, ta xap baaii, iwaa aina amangieli xuan tsaa. A se malen a se rili no ulina.

⁶ Nawe xa aina a xap baaii xuan, iwaa aina na xitipi no ulina: ma nawe amangieli ia, na xitipi o na rili no ulina, na suk baaii mu xuan.

⁷ Taamat na xap baaii xuan amuina ia patpat-sen ma ia xan minaalam Moroaa: Oro aina ia xan minaalam taamat.

⁸ Sinsa, taamat a xap tampek xaal sin aina; oro aina a tampek xaal sin taamat.

⁹ Ma Moroaa tii xap xosaraa taamat ngali aina, oro Moroaa a xosaraa aina ngali taamat.

¹⁰ Ngali abala muina mu, ma amuina sin no angelo, no aina bula di na ie axixila ina banam papan xadi no xuan.

¹¹ Lalon xida xalkale sin Orong, aina a xap man palaaen taamat ma taamat a xap man palaaen aina.

¹² Sinsa malen aina axaal sin taamat, taamat bula aina ataxaanai. Oro no maarang araraa axaal sin Moroaa.

¹³ Gim na ininte sin gim tsaa, we axaau ngali aina na sawit laa sin Moroaa sin ta xap baaii xan xuan?

¹⁴ Xadi no namaang no inaman alengi gim we, nawe no ulina xa taamat adisdis, biao naba amangieli ia.

¹⁵ Oro nawe xa aina adisdisi ulina, biao xan minaalam, sinsa Moroaa a tali abia ulina ta disdis ngali baaii xan xuan.

¹⁶ Nawe xa a wena engangaae taman abala maarang, ia we ina paare weaatala: Giem xap amusili xa namaang xaatsap ma xan no mate-naa Moroaa lalon biexaa xobel bula.

Xan luxaal Orong

(Metiu 26:26-28; Mak 14:22-24; Luk 22:17-20)

¹⁷ Lalon abala no asasing ia xap pa'ii gim, amuina lalon nagim no xalkale etudim tsaa a

xap tiltsomi biexaal oro a xosaraa atsaxati xan matenaanua Morooa.

¹⁸ Setauan iaa longmien we, biala gim xaa tsap etudim malen xan matenaanua Morooa, gim xaa tseixirixi gim tsaa ma sin nugu adodo iaa taltaalnge we aso.

¹⁹ Aso biexaa no mat laxen tseixirixi biala labatina gim ngali asen saa ia, Morooa ta taton sin.

²⁰ Biala gim ta le tsap etudim, a xap xan luxaal Orong abia gim ta ngani,

²¹ biala gim ta angen, gim xuxuuk gim angen laamua o gim ga xap liliisi xa bula. Axuuk a itol, o iexa a nun tangtangabaa:

²² Asen parawe, a xap nagim xaa anua ngali nun ma angen lalon? O gim nen amagurusiki xan matenaanua Morooa ma gim ga amangieli no muun was? Iaa ba wesa sin gim? Gim we iaa na pa'ii gim ngali abala no maarang? Asuk xap!

²³ Iaa adi abala asasing xaal sin Orong ma iaa ga tali no laa sin gim, di weaatala: iwaa Orong Iesu, sin abia bing Judas ta babel tali ia, tii adi tsoki,

²⁴ ma biala ta se putsangi axaau laa sin Morooa atsabaxi tsoki ma ga paare we, "Balawaa nugu pakpak, iaa tali ngali nagim axaau: Gim na tigiri xosaraa abala ngali adodomi iaa."

²⁵ Sin abia uk sal, mil ina luxaal adi sobuk ma ga paare we, "Balawaa sobuk, biala xuxubu uul lalon nugu dal, gim na xosaraa weaatala, biala gim ta adodomi iaa gim nun."

²⁶ Biala gim ta ngani abala tsoki ma nun nan abala sobuk, gim ba paatinai xan minet Orong

pupua sin naba talaa mula.

²⁷ Biaabi, sa ia ta ngani tsoki o nun nan xan sobuk Orong, ga xap manglen, a se til nan ininte sin ta xosaraa namaang tsaxa ngali epuske mii xan pakpak ma dal Orong.

²⁸ Axaau ngali taamat na nen usili xan tino tsaa setauan sin naba ta ngani abia tsoki ma nun sin abia sobuk.

²⁹ Ngali saa ia ta ngani ma nun ta xap nen xilalaa xan pakpak Orong, a se ngani ma nunngi ininte papan ia tsaa.

³⁰ Ngali abala muina xuduxudu labatina gim di ga malumlum ma di ga maramase, ma biexaal ina gim di se met.

³¹ Oro nawe gita setauan ininte sin gita tsaa, gita ba xap xaalame paina xan ininte Morooa.

³² Biaa Orong ta ininte sin gita, Orong a we na arongi atutiki gita, ngalibi Morooa naba xap atut tali gita mii xolkolmoxo ina inaman.

³³ Biaabi nugu no taamat biaa gim tsap etudim ngali angen, gim na liliis ngali gim xuxuuk.

³⁴ Nawe xa a itol, axaau na angen tatan, ngalibi biaa gim ta tsap etudim, Morooa naba xap ininte sin gim.

Ngali biexaa maarang, iaa ba atutiki no sin iaa ba ta xaalame.

12

No tinabel ina nantanua

¹ Nugu no taamat, talaawaa, iaa we ina asaait alengi gim taman abia tinabel ina Nantanua Pat, ☆ iaa saan ngali gim na ie adodo axaau sin abala.

² Gim atii we, biao gim tii langaari tsaa sin no malagan lalon no mat sal, ☆ di ga tii laamungen gim laa sin no malagan di ta ngus bong, ma gim ga langaari laa sin di. ☆

³ Biaabi iaa ba asaaiti gim we, a xap xa ta pa-paare lalon Nantanuan Morooa we, "Gita xororaa Iesu," ma a xap xa na pupua ngali paare we, "Iesu ia Orong," oro sin Nantanua Pat mu.

⁴ No mat laxen tinabel a xaatsap no, oro Nantanua Pat mu iwaa ta tali no.

⁵ Biexaa mat laxen tinaxaa ngali tiltsomi a xaatsap, oro gita taxaa ngali Orong ta xuuk mu.

⁶ Biexaa mat laxen xoror ngali xosaraa no maarang a xaatsap oro iwaa uk Morooa a taxaa lalon di araraa sin no inaman araraa.

⁷ Xan watwat Nantanua Pat asen lalon biexaa sal sin no inaman xuxuuk ngali xadi axaau araraa. ☆

⁸ Nantanua a tali inesaait ina sinaae laa sin xa ta xuuk; o iwaa uk Nantanua a tali inesaait ta us taman sinaae mamainaang, sin iexa, ☆

⁹ iwaa uk Nantanua a tali tinabel ina tinaalnge laa sin iexa, ☆ ma iwaa uk Nantanua bula, a tali biexa tinabel ina atotoaa xa sin iexa. ☆

¹⁰ A tali no axixila xoror ☆ sin iexa, a tali tinabel ngali tsap propet ☆ laa sin iexa, a tali sinaae ina

☆ **12:1 12:1** Rom 11:1; 1Ko 1:7; 14:1, 37 ☆ **12:2 12:2** Epe 2:2

☆ **12:2 12:2** Saam 115:5; Jer 10:5 ☆ **12:7 12:7** 1Ko 14:12; Epe

4:12 ☆ **12:8 12:8** 2Ko 8:7 ☆ **12:9 12:9** Met 17:19-20; 1Ko 13:2

☆ **12:9 12:9** Met 10:1; 1Ko 12:28-30 ☆ **12:10 12:10** 1Ko 12:28-30;

Gal 3:5 ☆ **12:10 12:10** Epe 4:11

nantanua ngali nan xilalaa no mat laxen tanua laa sin iexa,✧ a tali papaare taman no mat xalam xaatsap laa sin iexa, o ngali paate alengi no muina ina no xalam laa sin iexa bula.

¹¹ Balawaa no araraa, no tinaxaa ina iwaa mu uk Nantanua, ta tali sin di xuxuuk malen xan adodo tsaa.

Pakpak a xuuk mii xan no xolkolot

¹² Pakpak axuuk mu, oro a xudu no xolkolot ina: O biao no xolot ina ta xudu, di esumae ngali atsapngen pakpak axuuk.✧ Malen mu xan pakpak Karisito.

¹³ Iwaa Nantanua ta xuuk axadaani gita laa lalon pakpak ta xuuk. Nawe no Jiu o no Gentail o untutule, o ne xa leiwaa, Morooa tii tali aia uk Nantanua sin gita lalon xida no butsa.

¹⁴ Balawaa pakpak, a xap xaka xolot na xuuk mu, oro atsapngen no daan xolkolot ina pakpak.

¹⁵ Nawe xadak nii paare we, “Amuina iaa xap lima, iaa xap xolot ina pakpak,” biao a xap muina, ngali ia naba xap tsap xolot ina pakpak.

¹⁶ Ma nawe talinga a paare weaatala, “Amuina iaa xap biao xeltsen mat, iaa xap ina abia pakpak,” biao a xap muina, ngali ia naba xap tsap xolot ina pakpak.

¹⁷ Nawe pakpak araraa atsap xeltsen mat, u ba sen lolong we? Nawe pakpak araraa na tsap talinga, u ba sen usus we?

¹⁸ Oro Morooa a se aturung axaautsi no xolot araraa ina pakpak, di xuxuuk, malen tsaa biao ta saan ngali.

19 Nawe di araraa di tsap xolot axuuk, itaa pakpak naba man?

20 Malen tsaa abia pakpak, no xolot ina ta xudu, oro pakpak axuuk.☆

21 Xeltsen mat a xap pupua ngali paare weaatalaa sin lima, "Iaa xap muun ngali iu!" Ma xo a xap pupua ngali paare sin xadak ma na paare we, "Iaa xap muun ngali iu!"

22 Oro biao a xap so, biexaa xolot ina pakpak biao ta se malumlum, di ie tinaxaa lot tsaa.

23 Ma no xolot ta amangieli gita, gita manglen buxaai no. O no xolot ta xap matmaten, gita xap asen no sin no inaman.

24 Oro biao no xolot ta matmaten, gita xap muun adodo buxa ngali. Oro Morooa a se aturung todomien abia no xolkolot ina pakpak, ma ga se tali mangmangle sin abia no xolot gita ta muun sin no.

25 Ngalibi naba xap tsexxirixi, lalon pakpak oro no xolot di ba xosaraa uk namaang ngali tilaamamil labatina di tsaa.

26 Nawe xa xolot ina pakpak a saaen sosong, biao no xolot araraa ina pakpak, di saaen sosong bula, nawe xa xolot ina pakpak di manglen, no xolot araraa ina pakpak di taton mii.

27 Talaawaa gim xan pakpak Karisito ma gim xuxuuk gim xolot ina.

28 Ma lalon xan matenaanua Morooa a axilangi di araraa,
setauan no aposal,
nanaalua no propet,
nanaatuul no unaasasing,

ma no unxosxosor axixila,
ma biala di ta ie tinabel ina atotoaa xa,
ma biala di ta pupua ngali tiltsomi biexaal,
ma biala di ie tinabel ngali laamuangen biexaal
ma biala di ta tsoli no xalam xaatsap.

²⁹ Asen parawe, di araraa di se tsap no aposal,
ngaa? Ma di tsap no propet araraa, ngaa? Ma di
se tsap no unaasasing araraa, ngaa? Ma di se tsap
no unxosxosor axixila araraa, ngaa?

³⁰ Asen parawe, di araraa di adi no tinabel ngali
atoaa no minet, ngaa? Ma ngali papaare sin no
daan xalam, ngaa? Ma ngali puxis alengi papaare
xuxii, ngaa?

³¹ Oro, gim na suk mangat buxa ngali adi no
xariin tinabel.

Ma talaawaa iaa ba asen sin gim biala sal ta suk
mamainaang so.

13

Xariin titii

¹ Nawe iaa pupua ngali paare taman xadi no
xalam no inaman ma no angelo, oro iaa ga xap
ie titii, nugu papaare asuk malen mu tengteng
ina xolomit ta teng bararok o ga ngaarere malen
torok.

² Nawe iaa adi biala tinabel xoror ngali tsap
propet ma nawe iaa pupua ngali atii no maarang
xuxii ma no sinaae araraa, ma nawe iaa ie
tinaalnge biala ta pupua ngali arisi no buk laa nan
xa xolot, oro ga xap nugu xa titii, iaa maarang
gomsaa mu.

³ Nawe iaa tabiel taman nugu no maarang
araraa sin no muunwas ma nawe iaa tali nugu

pakpak ngali auki taman ie, oro ga xap ie titii, iaa maarang gomsaa mu.

⁴ Iwaa xa ta ie titii a liliis adamis ngali biexaal, ☆ xan namaang axaau, a xap bal tsaxa, a xap paraak, a xap pepesok.

⁵ Iwaa xa ta ie titii a xap amangieli xaal, a xap angen tsaxa, a xap mangmaga isagaa, a xap adodomi no namaang tsaxa di ta xaa xosaraa sin.

⁶ Iwaa xa ta ie titii a xap taton sin namaang morokon, oro a papaalam taman so.

⁷ Iwaa xa ta ie titii, a tigiri xoxo, a tigiri taalnge, a tigiri liliis adamis lalon tinaalnge, a tigiri taxaa watwat.

⁸ Titii naba suk xap litke. Oro itaa xadi totore no propet di ba xap, itaa papaare ina xalam, di ba man adamis; itaa sinaae aman, naba maraamen.

⁹ Amuina gita atii no xolot mu, ma gita tali no totore ina propet sin xolkolot mu.

¹⁰ Oro biao axaau araraa naba ta xaalame, biao ta xap axaau naba maraamen.

¹¹ Biao iaa tii tsi dokdok, iaa tii paare malen xa tsi dokdok, iaa adodo malen xa tsi dokdok, nugu sinaae a malen tsi dokdok. Ma biao iaa ta se tsap taamat laba iaa suk papaalii biao namaang mil ina tsi dokdok.

¹² Talaawaa gita xap nen axaautsi Morooa malen gita ta lasi gita tsaa lalon tintinarun, mil gita ba lasi axaautsi ia malen gita ta lasi gita xuxuuk talaawaa.

¹³ Ma talaawaa, biao no namaang ta tuul, a manman: tinaalnge, liliis taman tinaalnge, ma titii, oro iwaa ta lot buxa iwaa titii.

14

Tinabel ina propet ma no xalam xaatsap

¹ Gim na amusili namaang ina titii[☆] ma gim na suk saansili no tinabel ina Nantanua,[☆] oro gim na suk watwat so ngali adi biaa tinabel ina tali totore ina propet tsaa.[☆]

² Amuina, nawe xa a papaare taman xa xalam xaatsap, a xap papaare sin no inaman, oro sin Moroaa. Aso, a xap xa na leng sin; amuina a papaare taman no totore xuxii xaal sin Nantanuan Pat.

³ Oro, biaa di araraa di ta paare taman totore ina propet, di papaare sin no inaman ngali awatwati di ma anaai di ma tali axoxorong sin di.

⁴ Iwaa xa ta paare taman no xalam xaatsap, atiltsoxo mii ia mu, oro iwaa xa ta tali xan totore Moroaa tsaa axosngi xan matenaanua Moroaa.

⁵ Iaa saan ngali gim araraa gim na paare taman no xalam xaatsap, oro iaa suk saan tsaa ngali gim na tali totore ina propet tsaa. Iwaa xa ta tali totore ina propet tsaa asuk lot buxa ngen aia ta paare taman abia no xalam, oro naba axaau nawe alengi, ngali xan matenaanua Moroaa, di ba alet inanaa.

⁶ Talaawaa nugu no taamat, nawe iaa xaalame sangan gim ma iaa ga papaare taman no xalam xaatsap, sen axaau iaa tali sin gim? Naba axaau nawe iaa asen xaa luluba uul o xaa sinaae mainaang, o tali xa totore ina propet o asasing ngali laamuangen gim.

☆ 14:1 14:1 1Ko 16:14 ☆ 14:1 14:1 1Ko 12:1 ☆ 14:1 14:1 Epe 4:11

⁷ Biexa bula, ngali no mat laxen tengteng ta xap tino, malen piut o arp, xa naba sen atik wenangenai sen ine abia di sar taman nawe di xap amusili axaautsi biala ine ina ananaan?

⁸ Ma nawe biala tail a xap atengsi axaautsi aia nan tortor ngali inesas, saa naba taxaaturung ngali inesas?

⁹ A malen bula abala, nawe gim paare alengi xawas taman xa xalam xaatsap, no inaman di ta xap atii. Di ba sen atik wenangen senaara gim ta papaare taman. Gim ba se papaare mu laa nan waa.

¹⁰ Asuk so maase balawaa xolkolmoxo auus taman no mat laxen totore, oro a xap xa ina abia no totore we a xap xaka muina.

¹¹ Nawe iaa xap leng sin muina ina xan papaare xa taamat, iaa xibong sin iwaa xa ta papaare ma iwaa xa ta papaare a xibong sin iaa.

¹² Aweaatia bula sin gim, sinsa gim mangat buxa ngali abia no tinabel ina nantanua, gim na tsap mamainaang lalon no tinabel biala ta anaai xan matenaanua Morooa.

¹³ Ngali abala muina, saa ia ta paare taman xa xalam xaatsap, na sawit ngali naba pupua ngali puxis alengi totore ta paare taman.

¹⁴ Nawe iaa sawit lalon xa xalam xaatsap, nantanuaaga asawit, oro nugu no adodo a xap leng.

¹⁵ Biaabi, iaa ba se xosaraa sa? Iaa ba sawit taman nantanuaaga, oro iaa ba sawit bula taman nugu adodo; iaa ba anan taman nantanuaaga, oro iaa ba anan bula taman nugu adodo.

¹⁶ Nawe u pa'ii Morooa taman nantanuaam,

lalon no xalam xaatsap, naba sen we sin aia ta xap leng sin muina ina num papaare ngali naba paare we, “Aso.” Amuina a xap atii sawe u ta papaare taman.

¹⁷ Iu suk pupua ngali putsangi axaau buxa oro a xap awatwati iexa taamat.

¹⁸ Iaa putsangi axaau sin Morooa, biao iaa ta paare taman no xalam xaatsap buxa ngen gim araraa.

¹⁹ Oro, lalon xan matenaanua Morooa iaa saan ngali paare taman xaa totore na lima ngali asingan no inaman ngen ngali paare taman 10,000 totore lalon xalam xaatsap.

²⁰ Nugu no taamat, gim na xap adodo malen notsi dokdok. Lalon namaang tsaxa, gim na tsap no madalak, oro lalon nagim no adodo, gim na malen no taamat laba.

²¹ Lalon lo Aisaia atala,
“Orong a paare,

‘Xaal sin no inaman ina no xalam xaatsap
ma xaal papan xadi no bulina no xibong
iaa ba papaare sin abala inaman,
oro mil di ba xap lolong sin iaa.’”☆

²² Biaabi totore ina xalam xaatsap, biao axixila, a xap ngali no untaltaalnge oro ngali no muun taltalnge, oro tali xan totore propet ngali no untaltaalnge, a xap ngali no muun taltalnge.

²³ Biaabi nawe xan matenaanua Morooa araraa di tsap etudim, ma di araraa di ga papaare taman no mat laxen xalam xaatsap ma biexaa inaman di ta xap leng o biexaa muun taltalnge, di ba xaalame ma di na paare we, “Gim no ngong.”

☆ 14:21 14:21 Dut 28:49; Ais 28:11-12

²⁴ Oro nawe xa muun taltaalnge o xa taamat ta xap leng a xaalame sin no inaman biao di ta tali xan totore propet, naba suk tsixi balan we ia untsaxa ma na til nan ininte nan no matan di araraa.

²⁵ Ma biao no maarang ta man xuxii nan xan butsa naba suk man lengleng. Ma naa sage putput ma langaari sin Morooa ma na paare we, "Aso, Morooa a manman labatina gim!"

Namaang ina langaari

²⁶ Nugu no taamat, gita ba sen paare we? Biao gim ta tsap etudim ngali langaari, no inaman araraa di ie ananaan, o xa totore ngali asasing, ngali asen xa papaare xuxii, o xa xalam xaatsap, o xa ngali puxis alengi muina xalam xaatsap. Balawaa no maarang araraa di na xosaraa ngali awatwati xan matenaanua Morooa.

²⁷ Nawe xa a papaare taman xalam xaatsap, o alua o a tuul, di na papaare, xuxuuk papan iexa ma xa na puxis alengi.

²⁸ Nawe a xap xa ngali puxis alengi totore, iwaa xa ta papaare na bong adamis nan xan matenaanua Morooa ma na papaare sin ia tsaa ma Morooa.

²⁹ Na lua o ne na tuul no propet di na papaare, ma biexaa inaman di na lolong ma ininte sin sawe no propet di ta paatinai we aso o a xap.

³⁰ Ma nawe xa totore xuxii a xaalame sin xa ta xalkale, iwaa nanaaxuuk ina taamat ta papaare na bong.

³¹ Gim araraa gim pupua ngali tali xan totore propet, iexa papan iexa, ngali no inaman araraa di ba alet asasing ma inanaa.

³² Biaa xadi no totore no propet a man paina xadi banam no propet.

³³ Amuina xida Moroaa, a xap Moroaa ina xale tangtangabaa, oro ia Moroaa ina malina.

Malen lalon xan no matenaanua Moroaa araraa ina no inaman pat,

³⁴ no aina di na man adamis lalon langlangaari. Di na xap papaare, oro di na adokdoki di tsaa paina xadi no maxis malen Moses tii atalaa lalon lo.

³⁵ Nawe di saan ngali atixi senaara, di na atsuraa xadi no maxis tsaa tatan di, amuina maarang ina minangel ngali xa aina na papaare lalon langlangaari.

³⁶ Gim adodo we, balawaa xan totore Moroaa a atiltsoli mii gim, ngaa? O gim mu biao no inaman biao totore ta se le tatanginai gim, ngaa?

³⁷ Nawe xa adodo we ia propet o ga adi tinabel ina nantanua, papaalii ia na nanxilalaa we, senaara iaa ta atala laa sin gim, biao xan totore watwat Orong.

³⁸ Nawe xa a nanlii abala, Moroaa naba nanlii ia.

³⁹ Biaabi nugu no taamat, gim na mangat buxa ngali tali totore ina propet, ma gim nangaam tilbanti biao papaare lalon no xalam xaatsap.

⁴⁰ Oro, gim na xosaraa no maarang araraa ngali amusili axaautsi no namaang axaau ina langlangaari.

15

Xan tinapaas mula Karisito

¹ Talaawaa, nugu no taamat, iaa saan ngali gim na asaait mulangenai gim taman abia inesaait mamainaang, biala iaa ta baais taman laa sin gim biala gim tii adi ma gim ga til papan.

² Sin balawaa mu inesaait mamainaang gim ga toaa, nawe gim taxaariti awatwati abia totore iaa ta baais taman sin gim, o nawe a xap, biala nagim tinaalnge amaara gomsaa.

³ Sinsa, senaara iaa ta tsiili iaa se tulen laa sin gim, malen biala lalaamua ina maarang ta suk watwat buxa: we Karisito amet ngali xida no namaang tsaxa malen di ta atala lalon inaatel pat,

⁴ biala di tii punami ia, ma Morooa tii ga atapaasi mulangen sin nanaatuul ina leng malen Inaatel Pat ta paare,

⁵ ma ga tii, asemat sin Pita* ma mil ga asemat sin sangaul ma ga laa lua.

⁶ Mil sin abia, asemat sin 500 ma biexaal bula ina xida no taamat sin abia uk leng, ma xuduxudu ina di, di ta tino tsaa, oro biexaal ina di, di se met.

⁷ Mil tii ga asemat sin Jeims, ma mil asemat sin no aposal araraa,

⁸ ma sin xapkap araraa ina, asemat sin iaa, malen aia xan nagaa ta taxaana amuxudaa sin ta xap xan leng tutiik.

⁹ Amuina iaa suk manguutngut buxa sin biexaa aposal ma ga xap pupua tsaa ngali di na putsangi iaa Aposal, amuina iaa tii xaa xosor tsaalen xan matanaanua Morooa.

¹⁰ Oro sin xan amiimiilam Morooa iaa se tsap malen iaa se atala, ma biala xan a amiimiilam

* 15:5 15:5 Pita - Biexa iesan Sepas.

sin iaa tii putsi buxaai balaaga. Iaa tii suk taxaa watwat buxa tsaa ngen biexaal ina di, ma a xap iaa tsaa, oro xan amiimiilam Moroaa bala ta manman ma ga taxaa mii iaa.

¹¹ Biaabi nawe babaais axaal sin iaa o nawe axaal sin di, giem baais taman balawaa amiimiilam ma gim ga taltaalnge sin.

Tinapaas ina minet

¹² Oro nawe giem baais taman Karisito we a tapaas mula xaal sin minet, ngalisa biexaal ina gim, di ta paare we, “No inaman di se met, di ba xap tapaas mula bula”?

¹³ Nawe a xap xa tinapaas mula sin minet, amat malen Karisito tii xap tapaas mula sin minet.

¹⁴ Ma nawe Karisito tii xap tapaas mula sin minet, xida no babaais a maarang gomsaa, mii nagim tinaalnge bula.

¹⁵ Nawe aso no minet Moroaa naba xap atapaasi mula, di ba tatanginai giem we, giem no tiltsoxoti ababaa ina Moroaa, amuina giem se paare leng taman Moroaa we atapaasi Karisito sin minet. Oro Moroaa tii xap atapaasi ia, nawe aso, biao no minet Moroaa a xap atapaasi mula.

¹⁶ Nawe no minet di xap tapaas mula, biao Karisito a xap tapaas mula bula.

¹⁷ Ma nawe Karisito tii xap tapaas mula, nagim no tinaalnge a maarang gomsaa mu; gim manman tsaa lalon nagim no namaang tsaxa.

¹⁸ Mil biao di, di ta met lalon Karisito, di se xaapina.

¹⁹ Nawe gita liliis taman tinaalnge lalon Karisito ngali no maarang naba ta xosaraa no

lalon tino lalon balan pula mu, no inaman araraa, di ba lolbiir buxa ngali gita ngen no inaman araraa.

²⁰ Oro soina abala, Moroaa tii atapaasi Karisito xaal sin minet, malen tii xubatsi we, naba atapaasi bula abia di, di tii se met.

²¹ Amuina biao minet tii xaal sin taamat ta xuuk, biao tinapaas mula ina no minet, axaal bula sin taamat.

²² Amuina, lalon Adam no inaman araraa di met, ma sin abia uk sal lalon Karisito no inaman araraa di ba tino mula.

²³ Oro no inaman di ba tino xuxuuk mula amusili xadi leng tsaa, Karisito ia nanaaxuuk ina no waawaan araraa, mil biao naba ta xaalame, biao di xan no, di ba tino mula.

²⁴ Mil sin xapkap ina no leng naba xaalame, biao naba ta tali abia Maradaan sin Moroaa iwaa Mom, mil sin ta se xosor atsoti no mat laxen xoror ina tanua araraa ina banam ma no xoror watwat.

²⁵ Ngali naba lalaamua malen king pupua sin ta se but aturungi xan no matenkorot araraa paina no xaden.

²⁶ Minet, ia xapkap se ina matenkorot ngali naba tsaalen araraai.

²⁷ Amuina inaatel a paare, “A se but aturungi no maarang araraa paina xaden.”[☆] Talaawaa biao ta paare we, “no maarang araraa” a se but aturungi paina ia, aleng we, balawaa totore a xap ngali Moroaa tsaa, iwaa ta aturungi no maarang araraa paina Karisito.

²⁸ Biao tii se xosaraa abala no maarang, mil xan tsi tsaa Karisito naba aturungi ia tsaa, paina Moroaa, iwaa naba ta aturungi no maarang araraa

[☆] 15:27 15:27 Saam 8:6

paina ia, ngalibi Moroaa naba laamuangen no maarang araraa.

²⁹ Talaawaa nawe a xap xa tinapaas mula, di ba xosaraa saa sin di, biao di tii axaxadaan ngali no minet? Nawe no minet di suk xap tapaas mula, ngalisa no inaman di tii axaxadaan ngali di?

³⁰ Nawe no inaman di se met o di ga xap tapaas mula, ngalisa gita ga tali mamaet sin gita tsaa sin no leng xuxuuk?

³¹ Nugu no taamat, iaa tigiri lasi minet sin no leng xuxuuk. Biao namaang aso malen iaa ta suk taton so amuina gim taltaalnge lalon Iesu Karisito xida Orong.

³² Nawe a xap xa tinapaas mula sin minet, ngalisa iaa ta tsaapi no mata uteng tala Epeso. Balawaa xan adodo taamat mu, ngaa? Iaa se adi semarang? Nawe no minet di xap tapaas, malen Aisaia ta atalaa,

“Gita na angen ma nun,
amuina nowa gita ba met.”☆

³³ Xa na xap laamuangen gim ngali laa palaaen namaang axaau, num no turan tsaxa, di ba xosor atsoti num namaang axaau.

³⁴ Gim na mula xaalame sin nagim no adodo tutiik, ma gim na xap bula xosaraa namaang tsaxa. Amuina biexaal, di xap saan ngali atii Moroaa. Iaa paare taman abala ngali amangieli gim.

Pakpak ta tino mula

³⁵ Oro xa naba atsura weaatalaa, “Moroaa naba sen atapaasi no minet we? Taman sen mat pakpak, di ba xaalame taman?”

³⁶ Gim no tangtangabaa! Sawe gim ta soxaa nan pula, naba xap tsik tsuul, oro na setauan met.

³⁷ Biaa gim ta sokso, gim xap soxaa xa pakpak ina ie oro gim soxaa mu xalitsa, ina wit o xa xalitsa ina xa maarang xaatsap. Gim xap soxaa xa mat laxen pakpak biaa naba ta tsik laa lapalaa mil.

³⁸ Oro Moroaa a tali sin ia pakpak uul malen xan saansaan, ma sin no mat xalitsa xuxuuk a tali xadi no pakpak tsaa.

³⁹ Biaa no pines araraa di xap etuna; xadi pines no taamat toto, xadi no matauteng, xadi no maan ma xadi no xoo bula.

⁴⁰ Biexaa pakpak bula in balalangit ma biexaal ina abala balan pula; oro biaa matmirmir ina abia no maarang in balalangit biaa xan tsaa ma biaa matmirmir ina no maarang lalon balan pula a xaatsap tsaa.

⁴¹ Xan matmirmir pal a xaatsap tsaa o xan uleng a xaatsap tsaa o no xadaxada di xaatsap tsaa; ma xan matmirmir iexa xadaxada axaatsap tsaa sin iexa.

⁴² Naba weaatala sin abia tinapaas mula ina minet. Biaa pakpak di ta punami naba maraap, o biaa naba ta tapaas mula taman pakpak uul biaa naba ta xap maraap.

⁴³ Biaa di ta punami abia pakpak ta xabaar, ma biaa ta tapaas mula taman matmirmir, di punami lalon malumlum, a tapaas mula lalon xoror watwat.

⁴⁴ Di punami abia pakpak mu ina pula, ma naba tapaas mula taman pakpak ina nantanua.

Nawe xa pakpak biao ina abala balan pula, biexa pakpak bula ina nantanua.

⁴⁵ Biao inaatel ta paare, *"Iwaa nanaaxuuk ina taamat Moroaa ta xosaraa, Adam, a tsap taamat toto lalon abala pula,"*☆ iwaa xapkap ina Adam ia nantanua iwaa ta tali tino.

⁴⁶ Pakpak ina nantanua a xap xaalame setauan, oro biao pakpak ina balan pula a xaalame setauan o mil maaba pakpak ina nantanua.

⁴⁷ Iwaa lalaamua ina taamat, Moroaa a xosaraa taman xuu ina pula; iwaa nanaalua ina taamat axaal balalangit.

⁴⁸ No inaman ina abala balan pula, di malen aia taamat Moroaa ta xosaraa taman pula. Ma di bula in tile lapalaa balalangit, di malen taamat in tile lapalaa balalangit.

⁴⁹ Ma malen mu gita ta adi patpatsen aia taamat in nan balan pula, ma gita bula gita ba adi patpatsen aia taamat ta xaal balalangit.

⁵⁰ Nugu no taamat, ia asaaiti gim weaatata, xida no pakpak xaal lalon abala balan pula, naba xap tapkina xan maradaan Moroaa, ma biao no pakpak ta maraap naba xap pupua ngali tapkina abia no pakpak ta xap maraap.

⁵¹ Gim lolong, ia ba asaaiti gim taman abala papaare xuxii: Gita araraa gita ba xap met, oro Moroaa naba putsii gita –

⁵² naba tsap isagaa mu, malen apunamat ina mat, sin xapkap ina tail. Amuina biao tail naba ta teng, ma Moroaa naba atapaasi mulangenai no

minet, di ba suk xap maraap ma Moroaa naba putsu gita.

⁵³ Amuina Moroaa naba putsu abia pakpak ta maraap laa sin abia pakpak ta xap maraap, ma ia naba putsu abia pakpak ta se pupua ngali met laa sin abia pakpak naba xap pupua ngali met.

⁵⁴ Biaa Moroaa naba putsu abia pakpak ta maraap laa sin abia pakpak ta xap maraap, ma ia naba putsu abia pakpak ta se pupua ngali met laa sin abia pakpak naba xap pupua ngali met. Mil xan inaatel Aisaia naba tsap so weaatata, "*Moroaa a se aiepatsaa araraai minet.*"☆

⁵⁵ "Minet, inaabi se num paapok ngali aiepatsaa num no matenkorot?

Minet, inaabi num xoror ngali tsotsoxo?"☆

⁵⁶ Biaa tsotsoxo ina minet biaa namaang tsaxa, ma xoror ina namaang tsaxa biaa lo.

⁵⁷ Oro asuk axaau maase sin Moroaa! Tii tali xida paapok xaal sin xida Orong Iesu Karisito.

⁵⁸ Biaabi nugu no xos ina taamat, gim na tilwat-wat, gim nangaam poroklii xawas na agiisgisi gim. Gim na tigiri tali gim araraa tsaa sin xan no tinaxaa Orong, amuina gim atii we, nagim no tinaxaa lalon Orong naba xap maarang gomsaa.

16

Axumuli xuxute ngali xan matenaanua Moroaa

¹ Talaawaa ngali sawe gim ba ta xosaraa taman abia xuxute gim ta axumuli ngali xan no inaman Moroaa, di ta xalkale Jerusalem. Gim na xosaraa

sawe iaa ta asaaiti xan no matenaanua Morooa in Galeisia ngali xosaraa.

² Sin nanaaxuuk ina leng sin no wik araraa, gim xuxuuk gim na aturung xaatsap ngen xaa nen xuxute, ngali aturungi amusili xan iliil, ngalibi biao iaa ta xaalame gim ba xap axumuli xaa xuxute bula.

³ Mil biao iaa ba ta tsap, iaa ba tali inesaait ngali paare leng sin no inaman gim ta se axilangi di, ma gim na tulen di taman nagim no tinabel laa Jerusalem.

⁴ Nawe axaau ngali iaa na laa bula, di ba es etaxaa mii iaa.

Xan atsutsura tsaa Pol

⁵ Mil sin iaa ba ta es tsiga Masedonia, iaa ba xaalame sangan gim amuina iaa ba es tsiga tsaa Masedonia.

⁶ Amat malen iaa ba man mii gim sin xaa leng, o iaa ba manngi bula teslaxum mii gim, ngali gim ba tiltsoxomi iaa sin nugu ines, itaa iaa ba ta laa.

⁷ Iaa xap saan ngali lasi gim talaawaa, iaa es limlim mu, mil maaba, iaa ba liliis taman tinaalnge ngali ben le man xaa leng mii gim, nawe Orong a siir.

⁸ Oro iaa ba lo manman tsaa Epeso pupua sin leng ina Pentikos,

⁹ amuina xaraxin mat a se tsalel sin iaa ngali xosaraa tinaxaa axaau ma xuduxudu di epuske mii iaa.

¹⁰ Nawe Timoti a xaalame sangan gim, gim na xap amataatinai ia, biao ta manman mii gim, amuina a taxaa laa taman xan tinaxaa Orong malen iaa bula.

¹¹ Ngali xa na palo ngali sirawaa ia, oro gim na tulen ia ngali asumaa xan ines lalon malina, ngalibi naba mula xaalame sangan iaa, sinsa iaa liliis ngali na mula mii xida no taamat.

¹² Talaawaa ngali xida taamat Apolos. Iaa ningi awatwati ia ngali laa sangan gim mii xida no taamat, ia tsaa a xap mager siir axaau ngali laa tia atalaa. Oro naba laa biao ne a pupua ngali laa.

¹³ Gim na xoxo, gim na tilwatwat lalon tinaalnge, gim na taamat marale ma gim na watwat.

¹⁴ Gim na xosaraa no maarang araraa lalon titii.

¹⁵ Gim atii we biao xan matenaanua Stepanas, di tii tsap no untaltaalnge setauan ngali puxisbal tia Akaia, ma di ga suk taliil sin xadi tinaxaa labatina no untaltaalnge. Nugu no taamat, iaa ningi awatwati gim

¹⁶ ngali adokdoki gim paina di ma sin no inaman araraa, di ta tsoxo lalon balawaa tinaxaa ma di ga taxaa taman xaraxin watwat.

¹⁷ Iaa tii suk taton sin xan tsinap Stepanas, Potunatas, ma Atsaikas, amuina di tii le tabiel taman senaara gim ta xap pupua ngali tali sin iaa.

¹⁸ Amuina di aiaawisi nantanuaaga ma nantanuan gim bula. Balawaa no mat inaman, gita na nen xilalaa di.

Pinpinis ma tataton

¹⁹ Xan no matenaanua Morooa tala nan prowins Asia di tali xadi pinpinis ma taton laa sin gim. Akuila ma Prisila delu tali xadelu lasiaat axaau lalon Orong sin gim ma xan matenaanua bula Morooa, biao di ta xaa exumule nan xadelu anua.

²⁰ Xida no taamat araraa atala di tulen xadi lasiaat axaau laa sin gim. Gim na elaba ngen gim xuxuuk taman engur ta pat.

²¹ Iaa Pol, iaa atala abala lasiaat axaau taman limaaga tsaa.

²² Nawe saa ia ta xap titii Orong, biao xoror tsaxa naba man papan. Xaalame, Orong.

²³ Xan amiimiilam Orong Iesu naba manman mii gim.

²⁴ Nugu titii laa sin gim araraa lalon Iesu Karisito. Aso.

Inesaait Mamainaang Laa Sin Notsi
The New Testament in the Notsi language of New
Ireland Province, Papua New Guinea

Copyright © 2024 Wycliffe Bible Translators, Inc.

Language: (Notsi)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-14

PDF generated using Haiola and XeLaTeX on 14 Aug 2025 from source files dated 14 Aug 2025

601480e7-130d-5189-be42-9e43a92dbdde